

NUTAAQ**Saqqummiussissutip 20. oktober 2011-meersup taartaa****(Atuutilerfissaata il.il. allanngorneri)****Uunga siunnersuut: Akileraaruserinermik ingerlatsineq pillugu Inatsisartut inatsisaata allanngortinneqarneranik Inatsisartut inatsisaat nr. xx, xx.xxxx 2011-meersoq****Saqqummiussissut**

(Aningaasaqarnermut Naalakkersuisoq)

Siullermeerneqarnera

Akileraaruserinermik ingerlatsineq pillugu Inatsisartut inatsisaata allannguutissaanut siunnersuut Naalakkersuisut sinnerlugit matumuuna saqqummiuppara.

Siunnersuut Akileraartarnermut Aqutsisoqarfiup akileraarutit sippuutaannit ilanngaassisinnaanerani erseqqissaaniarneruvoq, tamannalu Inatsisartut Ombudsmandiata suliassamut aalajangersimasumut tunngatillugu oqaaseqaataanik tunngaveqarpoq.

Siullermik ajuusaarutigaa siunnersuut piffissaatillugu ilanngunneqartussatut nalunaarutigineqarsimanngimmat. Piffissaq qaangiutereersoq ilanngunneqartussatut nalunaarutiginninnermut pissutaavoq ajornartorsiutip pingaarluinnartuunera, tassami inatsisitigut maleruagassiat tunngaviat innuttaasut pisortallu oqartussaasut eqqarsaatigalugit pilertortumik erseqqissarneqartariaqarmat.

Inatsisartut Ombudsmandiat suliassami aalajangersimasumi naliliisimavoq Akileraartarnermut Aqutsisoqarfik innuttaasup akileraarutit sippuutaannit pisassaasa ilaat, kommunimut akileraarutininut tunngassuteqartut pineqartup akitsuutininut akiitsuuninut ilanngaatigisinnaanngikkai, kommunimummigooq akileraarutininut tunngasut kommunip akiligassarimmagit.

Akileraartarnermut Aqutsisoqarfik ukiut tamaasa, akileraarutit sippuutaannik tunniussilernerminut atatillugu ilanngaassuiuartarpoq. Taamaattumik taamatut ilanngaassuisarnermut tunngaviup nalornissutigineqannginnissaa pingaartuuvoq. Erseqqissaanissamik siunnersuutigineqartukkut nalornissutaajunnaassaaq Akileraartarnermut Aqutsisoqarfik akileraarutit sippuutaannik tamarmiusunik Namminersorlutik Oqartussanut akiitsuuninut maannamutuut ilanngaassisinnaasoq.

Kiisalu inatsisissatut siunnersuut tassungalu oqaaseqaatit innersuussutigaaqka.

Taama oqaaseqarlunga siunnersuut Naalakkersuisut sinnerlugit Inatsisartunut suliassanngortippara, aammalu Aningaasaqarmut Akileraartarnermullu ataatsimiititaliamit sularineqareerpat aappassaaniigassanngortillugu.